

EDITORIAL

Pagsukol ang bugtong dalan ilalum sa rehimeng US-Marcos

Nagkagrabeng pagpangdaugdaug ug pagpahimulos ang nasinati sa katawhang Pilipino samtang labaw nga nagkagrabe ang mga bata-kang problema sa imperyalismo, pyudalismo ug burukrata-kapitalismo ilalum sa rehimeng US-Marcos. Walay kapareho nga korapsyon, terorismo sa estado, pagyukbo sa mga langyaw ug mga palisiyang paantus sa katawhan ang seguradong pagaatubangon sa mosunod lima ka tuig. Walay laing kapilian ang lapad nga masa sa katawhan kundili ang militanteng pagsukol aron panalipdan ang ilang mga katungod ug iasdang ang ilang mga pangandoy alang sa tinuod nga nasudnong kagawasan ug demokrasya.



Ilehitimo ang lantaw sa lapad nga mga sektor sa pagkapresidente ni Marcos Jr tungod kay nakalingkod kini pinaagi sa dayag nga pagpanglimbong sa *automated* nga sistema sa eleksiyong 2022. Labaw pa kining nawad-an og kredibilidad atubangan sa hilig sa paglulinghayaw sa ubang nasud gamit ang kwarta sa katawhan, ang pagkahilig sa pagpanindot sa imahе sa amahan niyang diktador ug pagapas nga angkunon ang gatusan ka bilyong piso sa pondong pangpubliko.

Kaylap ug mograbe pa ang korapsyon ilalum ni Marcos. Nagkapuliki siyang bawion ang tagong bahandi nga gikawat panahon sa 14-ka-tuig nga diktadurya sa iyang amahan. Gibalik niya sa gahum ug pribilehiyo ang kanhing mga kroni ug pamilya. Sama sa iyang amahan, ginahatagag pabor ug ginatagbaw ni Marcos ang mga upisyal militar

sa dakung pondo sa katawhan sa takuban sa "modernisasyon sa militar" ug "kontra-insurhensiya."

Nag-unang kakunsabo sa nagharing pamilyang Marcos ang mga Duterte ug Arroyo, parehong nabantog sa korapsyon ug pasismo. Pareho silang ginahatagag kontrol sa dakung pondo sa gubyerno, ingonman, sa mga pribilehiyo aron palapdon ang ilang negosyo ug dinastiya. Nakatak dang pirmahan ni Marcos ang Maharlika Investment Fund sa umabutay nga semana. Pagagunitan ni Marcos ang ₱500-bilyon pondo sa publiko aron paburan ang iyang mga kroni ug palapdon ang suportang pangpulitika.

Sukad nakalingkod sa poder, kanunay nagayukbo si Marcos sa langyawng mga *superpower* (labing gamhanan), ilabina sa gahum militar ug interes sa ekonomiya ug heopulitika sa imperyalismong US, ug sa mga ahente niini sa pinansya sa-

ma sa World Bank ug uban pang institusyon. Nagahalok usab kini sa tiil sa China bisan atubangan sa direktang interbensyon sa teritoryong pangdagat sa nasud.

Padayon nga ginaduso ni Marcos ang mga neoliberal nga palisiya, bisan og gisalikway na kini sa ubang nasud, ilabina sa dagkung kapitalistang ekonomiya. Bunga niini, padayon ang pagkaguba sa lokal nga produktibong pwersa, ginahikawan ang katawhan sa ilang mga kagamitan ug panginabuhian, ug ginaguba ang lokal nga ekonomiya. Ilalum ni Marcos, todo-todo ang pag-import og mga produktong pang-agrikultura nga nagapatay sa lokal nga produksyon, lakip ang walay-susamang dinaghan nga pag-import og bugas. Labaw pang mobaha ang mga imported nga produktong pang-agrikultura sa pagpamyembro sa nasud sa Regional Comprehensive Economic Partnership (RCEP) nga seguradong magresulta og labing dakung dislokasyon sa panginabuhian sa minilyong Pilipino.

Ginasubasta ni Marcos ang Pili-

pinas sa mga langyawng dagkung kapitalista. Pang-agni ni Marcos ang saad nga dili buhisan ang operasyon sa dagkung langyawng negosyo, ug ang ubos nga suhulan sa mga mamumuo. Gigamit usab ni Marcos ang iyang pusisyon sa Department of Agriculture aron iduso ang interes sa mga korporasyong agribisnes kauban ang World Bank ug uban pang langyawng bangko sa takuban sa "pagpataas sa produktibidad" sama sa palpak nga programang Masagana 99 nga naglubong sa gatasan ka libong mag-uuma sa utang.

Labing tataw ang pagpakaitoy ni Marcos sa mga langyaw sa paghatag-dalan niini sa plano sa US nga magtukod og dugang upat ka base militar ilalum sa Enhanced Defense Cooperation Agreement (EDCA), gawas sa uban pang pasilidad nga tago nga ginatukod sa US kakunsa-bo ang Armed Forces of the Philippines (AFP). Kabahin kini sa estratehiya sa US nga magtukod sa mga base militar aron liyukan ang karibal nga China. Gipasagdan ni Marcos nga gamiton ug mahigop ang nasud sa posibleng armadong kaguliyang sa mga higanteng imperyalista.

Kung unsa ka okupado si

Marcos sa pag-alaga sa interes sa mga langyawng kapitalista ug gahum, ingon usab ang pagpabungolbungol niini sa reklamo sa masang Pilipino. Wala siyay pagtagad sa singgit sa mga mamumuo ug mga empleyado alang sa mahinungdanon umento sa suhulan ug sweldo aron makaalibyu sa nagkataas nga presyo ug pugngan ang pagkunhod sa ang-ang sa ilang panginabuhi. Wala niya ginatagad ang singgit alang sa tinuod nga reporma sa yuta ug malukpanong krisis sa agrikultura, ug ginapaburan na hinuon ang mga plantasyon, kumpanya sa mina, konstruksyon sa mga dam ug uban pang imprastruktura, proyektong ekoturismo ug pang-enerhiya nga hinungdan sa malukpanong pagpangilog og yuta. Ginaduso niya ang palisiyang labor-export isip pangtupal nga solusyon sa grabeng problema sa disempleyo.

Giilog sa masang anakpawis ang ilang mga kagamitan sa produksyon ug gihikawan sa panginabuhian ilalum sa mga palisiya ug programang pabor sa mga langyawng kumpanya ug mga kakunsa-bo nga dagkung negosyo. Malukpanon kining nagakahitabo sa kabanikanhan, ingonman sa kasyudaran sa kaso sa mga drayber ug operey-




tor sa mga dyip nga gustong hikawan sa ruta ug bawalang gamiton ang ilang mga sakyanan, lakip na ang mga mangingisdang ginaabog sa proyektong reklamasyon ug lainlaing ordinansa.

Walay gihimo si Marcos para sulbaron ang problema sa nagkataas nga presyo sa mga batakang panginahanglan. Walay pulos ang pipila ka tindahan nga Kadiwa atubangan sa minilyong kabus nga pamilyang Pilipino. Kakunsa-bo ni Marcos ang mga kartel ug ismagler nga nagakawkaw sa dakung kwarta gikan sa pagkontrol sa suplay ug pagpataas sa presyo sa bugas, asukal, sibuyas ug uban pa.

Pasistang terorismo ang tubag ni Marcos sa pangayo ug panawagan sa masang Pilipino. Ginagamit ang mga armadong ahente sa estado sa kampanya sa pagsumpo sa mga unyon ug organisasyong nag-silbing braso ug tinubdan sa kusog sa katawhan. Walag-too ang mga kaso sa pagpatay ug masaker, ug mga pagdagit, iligal ug dinugay nga pagpriso sa mga detenidong pulitikal. Nakapailalum sa balaod militar ang daghang baryo sa kabanikanhan kung asa nagharihari ang mga pasistang sundalo ug paramilitar ug ginapailalum sa kahadok ang katawhan. Bisan sa kasyudaran, ginasulod sa mga ahenteng militar ug pulis ang mga pabrika, komunidad, mga eskwelahan, buhatan, ug uban pa sa takuban sa "gyera kontra-terorismo" aron magsabwag og teror sa katawhan.

Atubangan sa nagkagrabeng pagpangdaugdaug, pagpaantus ug pagpanumpo, walay laing kapilian ang katawhang Pilipino gawas sa paglunsad sa tanang porma sa pag-sukol—gikan sa kadalanan ngadto sa kabukiran—aron panalipdan ang ilang kaayuhan, iaslang ang ilang interes ug ipakigbisog ang hustisya. Kinahanglang dugang palapdon ug pakusgon ang mga organisasyong masa ug tukuron ang pinakalapad nga panaghiusa sa katawhan aron ihimulag ug batukan ang anti-katawhan, maki-langyaw ug pasistang rehimen US-Marcos.

AB

 <p>Bolyum LIV Ihap 13 Hulyo 7, 2023</p> <p>Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles. Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.</p>	<h2 style="text-decoration: underline;">Unod</h2> <p>Editorial: Paglaban ang tanging daan sa ilalim ng rehimen US-Marcos 1</p> <p>Palpak at pahirap sa mamamayan 3</p> <p>Militarista sa kagawaran ng edukasyon 4</p> <p>2 armadong aksyon, inilunsad ng BHB-Abra 5</p> <p>Barya-baryang minimum, tinuligsa 5</p> <p>Hatol sa konsultant ng NDFP, kinundena 5</p> <p>Mga protesta 5</p> <p>Mga manggagawa sa Mindanao, nagtitiis 6</p> <p>94th IB sa Negros, berduhong batalyon 7</p> <p>Sa madaling salita 8</p> <p>Palayain ang lahat ng bilanggong pulitikal 9</p> <p>Pride: Dagdag-sahod, karapatan at soberanya 9</p> <p>Pang-aataking militar sa 5 prubinsya 10</p> <p>Kinakasuhan ng "terorismo," dumarami 10</p>
<p>Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas</p>	
 ang.bayan@cpp.ph	 @ThePeople1969

Palpak ug paantus sa katawhan

Gidumdum sa mga progresibong grupo pinaagi sa pagprotesta sa Maynila ang unang tuig sa ilehitimong presidente nga si Ferdinand Marcos Jr niadtong Hunyo 30. Ayha niini, gilunsad nila ang usa ka People's Summit kung asa gikundena sa lain-laing sektor ang pagkainutil, pasismo ug pagpakaitoy sa iyang rehimen.

"Mahal sa Pilipinas," pamahayag sa mga raliyista nga gipangunahan sa Bagong Alyansang Makabayan. Pakyas ang rehimeng Marcos nga rendahan ang pagsaka sa tantos sa implasyon, nga taas kaayo sa milabayng 14 ka tuig niadtong pagusugod sa 2023.

Imbes nga ang saad nga ₱20 kada kilo, ₱40 na ang pinakabaratong bugas sa Metro Manila, matud sa mga mag-uuma. Kumpara sa milabayng tuig, mas taas ang presyo karon sa karne, isda ug halos tanang utan, ahos, sibuyas ug asukal. Mas taas usab ang singil sa tubig ug kuryente, ug plete. Luyo niini, nagpabiling ubos ang pagpalit sa ani sa mga mag-uuma.

Walay gisulti si Marcos sa hisgutanan sa pagsaka sa suhulan, bisan og wala miabot sa gitawag og *poverty threshold* ang abereyds nga minimum nga suhulan sa nasud. Walay programa ang iyang rehimen sa pagmugna og disentang trabaho ug padayon niining ginaduso ang pag-eksport sa pamuo aron pugaon ang remitans sa minilyong migranteng Pilipino. Mokabat sa 70% sa lokal nga pwersa sa pamuo ang impormal ug nag-antus sa ubos kaayong kita, kawalay kasiguruhan sa trabaho ug pagpangabuso sa mga awtoridad.

Mialma ang mga empleyado sa gubyerno sa padayon nga pagpatu-

man ni Marcos sa ubos kaayong sweldo sulod sa burukrasya ug kontraktwalisasyon sa 700,000 ka empleyado sa gubyerno.

Sa karon, ang Pilipinas ang adunay pinakataas nga "income inequality" o kawalay kaangayan sa kita sa East Asia. Ang labing adunahang 1% ang nagakontrol sa 17% sa nasudnong kita, samtang ang pinakakabus nga 50% nakatagamtam lamang og 14%.

Walay unsamang gihatag nga alibyo ang rehimen, ug gikunhuran pa hinuon og hangtud 99.78% ang mumho nga ayuda. Gikan ₱233 bilyon niadtong 2020, naggahin lamang og ₱510 milyon ang rehimen alang sa 2023.

Gipadayon ni Marcos ang mga palisiya ug programang neoliberal ug maki-langyaw nga nag-abli sa mga rekurso sa nasud sa pagpangawkaw ug agresyon sa takuban sa paglambo. Gideklara niyang krusyal ang operasyon sa magun-ubong pagmina, pagtukod og dagkung dam, konstruksyon sa mga planta sa enerhiya sa takuban sa *renewable energy*, ingonman ang ekspansyon sa mga komersyal nga plantasyon, lugar pangturista ug sona sa pamuo. Gitugutan niyang magpadayon ang 187 ka proyektong reklamasyon nga miguba sa mga baybay ug kadagatan.

Bangis nga gipahilum sa rehimen ang pagsupak sa mga mag-uuma, mangingisda ug lumad sa mga proyektong moguba sa ilang panginabuhian ug palibot. Walay hunong ang pagmasaker, pagpamatay, iligal nga pag-aresto ug detensyon, ingonman ang pagpamomba, *hamletting* ug militarisasyon.

Sukad nga makalingkod sa poder, 13 ka beses mibyahe pagawas sa nasud si Marcos, kauban ang iyang pamilya, mga higala ug gipaborang negosyante. Magkauban nilang gibaligya ang kinaiyanhong mga rekurso ug baratong kusog-pamuo sa nasud sa langyawng mga kapitalista, sa paglaum nga makigsosyo kini sa lokal nga mga burukrata ug burgesya.

Gawas sa pag-usik-usik sa pangpublikong pondo, pagpadatu sa kaugalingon ug iyang pundok ang gikapulikian ni Marcos sa iyang unang tuig. Sa 31 ka prayoridad nga sugyot balaonon nga giparatsada niya sa Kongreso, 29 dinhi ang direktang nagsilbi sa interes sa iyang mga kroni ug sa pagpabilin sa kasamtangang kahimtang.

Nag-una dinhi ang sugyot nga pagmugna sa Maharlika Investment Fund nga magsentro sa binilyong pondo sa iyang mga kamot ug sa iyang gipaburang mga upisyal ug negosyante. Giaprubahan usab sa Ubos nga Kapunungan ang 30-ka-tuig nga National Infrastructure Program Bill (nga may islogang "Building Better More") aron mahimong tinubdan sa korapsyon. Halos dungan nga giaprubahan ang National Land Use Act nga maghatag dalan sa malukpanong pagpangilog ug kumbersyon sa ekta-ektaryang yutang kabilin ug agrikultural.

"Walay rason aron saulugon ang unang tuig ni Marcos sa gahum," matud sa Bayan. "Kinahanglang padayon kining batukan sa kontrakabus ug kontra-Pilipinong mga palisiya, ug iduso ang pangandoy sa katawhan alang sa tinuod nga kagawasan, demokrasya ug kalamboan." **AB**



Militarista sa departamento sa edukasyon

Sukad sa sinugdanan, supak na ang mga magtutudlo sa pagtudlo sa ilehitimong bise presidente nga si Sara Duterte isip kalihim sa Department of Education (DepEd). Matud nila, walay luna sa departamento ang usa ka militarista, ignorante sa kasaysayan ug lutang sa kamatuuran nga sama ni Duterte. Wala usab siyay bakgrawnd o kasinatian aron pangulohan kini.

Human ang halos usa ka tuig nga pangatungdanan, dayag ang militaristang panghunahuna ni Duterte sa iyang walay hunong nga retorikang anti-komunista ug pagpangatake sa mga magtutudlo. Gigamit niyang entablado ang DepEd aron moaktong tigpamaba sa militar, sa kahimtang nga wala siya gitudlo sa gikahinaman niyang Department of National Defense.

Ginapugos niya ang iyang kaugalingon isip hepe sa reaksyunaryong hukbo isip kabahin sa iyang pagpostura alang sa mosunod nga eleksiyong presidensyal. Gikalipay niya ang pagtudlo kaniya isip *co-vice chairperson* sa National Task Force-Elcac niadtong Mayo nga gihimo isip pag-ila sa iyang todotodong suporta sa laraw sa ahen-sya.

Labaw sa pagka *red-tagger*, dala ni Duterte sa departamento ang kunuhay kadaugan sa "lokal nga kalinaw" sa Davao City, nga nakabot pinaagi sa brutal nga kampanyang pagnumpo nga gihulagway sa mga masaker, pagpamaty, pagpangaresto, pugos nga pagpasurrender ug pagpailalum sa tibuok komunidad sa paghari sa militar.

Samtang nagkapuliki sa mga militaristang tumong, pakyas si Duterte nga atubangon ang krisis sa pagkat-on o edukasyon nga gipagrabe sa sayop nga mga palisiya sa iyang amahan nga si Rodrigo Duterte niadtong panahon sa pandemya. Pakyas usab siyang tubagon ang reklamo sa mga magtutudlo alang sa disentang sweldo, maayong kundisyon sa pamuo, seguridad sa trabaho ug paghatag og mga benepisyo sa takdang panahon. Kaulaw ang dala niya sa departamento nga dili makahatag og saktong alawans, sama na lang sa baho ug dili makaon

nga bugas nga giuli sa mga magtutudlo niadtong Hunyo.

Nagpabiling babag sa dekalidad nga edukasyon ang kakulangan sa personel, klasrum, libro ug uban pang dugay nang problema sa sektor. Dakung kapalpak ang paglunsad sa mga klase sa milabayng ting-init tungod sa piot ug init nga mga klasrum.

Sama sa iyang amahan, ginatabunan ni Duterte ang iyang mga kapalpak sa sublisubli nga pagpangda-ut sa progresibong mga organisasyon, nag-una sa unyon sa mga magtutudlo.

Niadtong Marso, *red-tagging* ang iyang tubag sa pagpanghingsog sa Alliance of Concerned Teachers (ACT) nga mag-empleyo og dugang 30,000 nga magtutudlo ug maggahin og ₱100 bilyon kada tuig sa mosunod nga unum ka tuig aron abton ang gidaghanon sa klase nga may 35 ka estudyante kada usa ka magtutudlo. Matud niya "dili reyalistiko ug imposible" ang sugyot, ug giatake pa ang mga magtutudlo nga nagpadayag sa lehitimong reklamo.

Gigamit niya ang pwesto aron pahilumon ang unyon sa mga magtutudlo. Niadtong Hunyo, nagpagula siya og memorandum aron kolektahon ug isumite sa sentral nga upisina sa ahensya ang pangalan sa mga myembro sa ACT. Lapas kini sa ginagarantiyang katungod sa pribasiya sa mga magtutudlo, katungod nilang mag-unyon ug magpadayag og reklamo. Sama lamang kini sa nauna nang iskema sa *profiling* nga gihimo sa Philippine National Police niadtong 2019. Ang maong *profiling* nagbunga sa mga "pagbisita" sa pulis sa mga eskwelahan ug balay sa mga myembro sa ACT, ug interogasyon ug sarbeylans kanila.



Peligro sa mga bata

Niadtong Hunyo, nabalita nga gitanyagan ni Duterte ang retiradong heneral nga matinud-anon sa dinastiya sa iyang pamilya og yaweng mga pusisyon sa DepEd. Gitudlo niyang *undersecretary* ug *assistant secretary* silang Ret. Maj Gen. Nolasco Mempin og Ret. Brig. Gen. Noel Baluyan bisan og wala silay bakgrawnd o kasinatian sa edukasyon.

Si Mempin ang nagsilbing kumander sa Task Force Davao ug 10th ID. Responsable siya sa pugos nga pagpasurrender sa mga sibilyan sa rehiyon sa Davao niadtong 2022. Si Baluyan, sa pikas bahin, ang nagsilbing upisyal sa Task Force Cebu og Assistant Division Commander sa 3rd ID. Ang maong dibisyon sa AFP ang responsable sa daghan kaayong mangilngig nga krimen sa isla sa Negros, kung asa lakip sa iyang mga biktima mga bata.

Sa ilalum ni Duterte, makanunayon ang pugos nga pagpasalmot sa mga menor-de-edad nga anaa sa Grade 11 ug 12 sa mga komperensya ug simposyum sa NTF-Elcac ug AFP. Dinhi, ginapig-ot sa mga sundalo ang katungod sa mga estudyante nga magreklamo ug mosalmot sa gusto nilang mga organisasyon. **AB**

2 ka armadong aksyon, gilunsad sa BHB-Abra

GILUNSAD SA MGA yunit sa Bagong Hukbong Bayan (BHB) ang duha ka armadong aksyon sa lungsod sa Sallapadan, Abra niadtong ulahing semana sa Hunyo batok sa nag-operasyong tropa sa 24th ug 102nd IB sa maong lungsod.

Unang giatake sa mga Pulang manggugubat ang nag-operasyong yunit sa 24th IB sa Sityo Mangmangga, Barangay Naguilian niadtong Hunyo 26. Usa ka sundalo ang napatay sa maong opensiba. Gisundan kini sa pagharas sa BHB-Abra sa tropa sa 102nd IB sa Barangay Bazar niadtong Hunyo 28. Duha ka sundalo ang nasamdan sa opensiba.

Sa Negros Occidental, giparalisa sa BHB-South Central Negros niadtong Hunyo 14 ang duha ka *backhoe* sa Sityo Bulod, Barangay Carabalan, Himamaylan City. Ginagamit ang mga *backhoe* sa konstruksyon sa Himamaylan-Tayasan Road nga maghatag-dalan sa dagkung kumpanya sa mina nga gustong mosulod sa kabukiran sa Cansermon, Tahod-Ilahas, Cambantog ug kasikbit nga mga lugar.

Ang duha ka *backhoe* nga gipanag-iyahan sa ESJ *construction firm* sa mga Javelosa ug mga Gensulin nagkantidad og ₱7.5 milyon. Walay nasakitan nga trahador sa kumpanya sa maong operasyon.

Sinsilyong minimum, gimakmak

NAGRALI ATUBANGAN SA Nepa-Q Mart sa Quezon City niadtong Hulyo 3 ang mga mamumuo sa National Capital Region aron makmakon ang ₱40 nga gidugang sa *regional wage board* sa ilang suhol. Kini nga umento, nga madawat sugod Hulyo 16, tugbang lamang sa 7% pagtaas sa kasamtangang suhulan sa rehiyon. Gimakmak nila ang "sinsilyong minimum" sa rehimeng Marcos.

Sa gipagula nga kamandoan, motaas ang suhulan sa mga mamumuo sa agrikultura, serbisyo ug negosyong *retail* gikan ₱533 ngadto sa ₱573. Ang mga industriyang gawas sa agrikultura magadawat og ₱610 gikan sa kanhing ₱570. Layo kaayo kini sa makabuhi nga suhulan nga ₱1,160 kada adlaw alang sa usa ka lima-katawong pamilya niadtong Abril. Ubos kaayo kini bisan ikumpara sa sugyot nga ₱150 *across-the-board* nga gisumite sa Senado.

Sayod ang mga mamumuo nga daku pa ang kinahanglang iduso alang sa dugang suhulan. Kung ang mga kapitalista ug estado ang masunod, wala o mas ubos pa ang ihatag nga umento sa rason nga makapataas kini sa tantos sa implasyon o makalugi sa negosyo. Nagsaad silang pakusgon pa ang pakigbisog alang sa makatarunganong dugang-suhulan sa tibuok nasud.

Hukum sa konsultant sa NDFP ug asawa, gikundena

GIKUNDENA SA MGA grupo sa tawhanong katungod ang hukum sa korte nga sad-an niadtong Hunyo 29 ang tigulang ug masakiton nga konsultant sa National Democratic Front of the Philippines (NDFP) nga si Frank Fernandez, 75, ug iyang asawa nga si Cleofe Lagtapon, 69. Ang hukum adunay kalabotan sa gamagamang kasong *illegal possession of firearms*.

Giaresto ang magtiayon, kauban si Ge-ann Perez, niadtong Marso 24, 2019 sa Barangay Calumpang, Liliw, Laguna. Ginapagawas kaniadto nga nakumpiska kanila ang tulo ka kalibre .45 pistola, tulo ka magasin ug mga bala, ug tulo ka granada.

Giaresto si Fernandez ug Lagtapon samtang nagpatambal sa Laguna. Si Fernandez adunay sakit nga *chronic artery disease, chronic stable angina, hypertension stage 2-uncontrolled, chronic obstructive pulmonary disease, ug hyponatremia*, gawas pa sa ubang sakit nga tungod sa katiguwangan.

Samtang, gibalita sa grupong Karapatan nga dili sad-an ang magtiayon sa mga kasong *illegal possession of explosives* ug COMELEC *gun ban*. Si Perez, nga akusado sa maong kaso, nahukmang dili sad-an sa tanang mga kaso ug gibuhian niadtong Hunyo 30.



Martsa kontra Ahunan dam. Nagmartsa ang mga residente sa Pakil, Laguna sa sentro sa lungsod niadtong Hulyo 1 aron ipadayag ang ilang pagsupak sa mga proyektong Ahunan ug Belisama Hydropower sa ilang lungsod. Pagatukuron ang Ahunan Dam sa Bundok Ping-as, nga makita dinhi. Gilunsad ang protesta human sa porum ug konsultasyon sa parehong adlaw nga gipasiugdahan sa Mamamayang Nagmamahal sa Pakil (Manapak).

Reklamasyon sa Bacolod City, batukan. Nagprotesta sa kadagatan ang mga mananagat ug kabus nga supak sa nakatakdang 1,018-ektaryang proyektong reklamasyon sa Bacolod City niadtong Hunyo 25. Nakighiusa sa protesta ang mga residente sa barangay sa Banago ug Punta Taytay, mga apektadong komunidad sa magunubong reklamasyon. Dala sa mga mangingisda ug residente ang ilang mga panawagan sakay sa duha ka *pump boat* ug 13 ka bangkang de motor.

Protesta sa mga ospital. Sunod-sunod nga protesta ug pagpamakmak ang gilunsad sa mga unyon sa mga mamumuo sa panglawas ilalum Alliance of Health Workers (AHW) sa lima ka ospital sa Metro Manila niadtong Hunyo 23 ug Hunyo 27. Gilunsad ang mga protesta kalabot sa usa ka tuig sa poder sa rehimeng Marcos ug ikaduhang *state of the nation address* niini. Dugang-suhulan, hinanaling mga benepisyo ug dugang-badyet sa pangpulikong panglawas ang ilang panawagan.

Mga mamumuo sa Mindanao, nag-antus sa ubos kaayong suhulan

Walay aksyon ang Regional Tripartite Wages and Productivity Boards (RTWPB) sa petisyon sa mga mamumuo alang sa dugang-suhulan gawas sa National Capital Region. Natanggong pa gihapon ang mga sugyot sa 10 RTWPB.

Kaniadto pang Hunyo 2022 ulahing nagmando sa mga umento ang mga RTWPB. Niini, ₱16 (BARMM) ang pinakaubos nga gidugang samtang ₱110 (Region VI) ang pinakadaku nga gipatuman sa duha ka umento. Kadaghanan sa mga rehiyon nagpatuman lamang og ₱30-₱60 nga umento. Relatibong taas ang minimum nga suhulan nga ₱533-₱570 sa NCR.

Sa Mindanao, mokabat sa abereyds nga ₱357.83 hangtud ₱376.33 lamang ang minimum nga suhulan. Pinakataas na ang gakadawat nga ₱443 sa mga mamumuo sa rehiyon sa Davao. Layo kaayo kini sa abereyds nga makabuhi nga suhulan sa isla nga ₱1,315/adlaw niadtong Abril. Aron makab-ot ang makabuhi nga suhulan, kinahanglang adunay umento sa suhulan ngadto sa ₱938.67 sa tibuok isla.

Sa estadistika sa estado niadtong Enero, anaa sa Mindanao ang kapin 23% sa populasyong 15-an-yos pataas o 17.82 milyon sa kinatibuk-ang 77.12 milyon sa nasud. Niini, 68.2% lamang ang langkub sa pwersa sa kusog pamuo. Sa parehong panahon, gibutang sa ubos nga abereyds nga 3.9% ang tantos sa disempleyo dinhi samtang 17.5% ang tantos sa kulang ang trabaho.


Sa usa ka pagtuon niadtong 2017, migawas nga usa sa matag lima ka mamumuo sa Mindanao ang nagapangita og dugang nga trabaho, apan kasagaran sa trabaho temporaryo o partaym. Anaa sa 90% sa kusog-pamuo ang anaa sa impormal nga sektor, mayorya sa agrikultura. Labaw nga dili in-

dustriyalisado ang ekonomiya sa isla, bisan ikumpara sa atrasadong kahintang sa mayorya sa nasud. Niadtong 2018, anaa sa 153,369 lamang ang mga mamumuong anaa sa pagmanupaktura kung asa 50,522 pa ang kontraktwal. Kapin 364,000 usab ang ginaempleyo sa transportasyon ug *storage, wholesale* ug *retail*, ug mga negosyong adunay kalabotan sa kuryente ug gas.

Samtang, mokabat sa 24,025 ang narekord nga ihap sa mga mamumuo sa kanhing 72 nga mga kumpanya sa mina ug kwari. Pinakakonsentrado (19,482) ang mga mamumuo sa minahan sa rehiyon sa Caraga kung asa 54% sa mga mamumuo ang kontraktwal. Sa kasamtangan, nakalansang sa ₱350 ang inadlawang suhulan sa mga mamumuo sa rehiyon.

Niadtong Hunyo, nagmalampuson ang unyon sa mga mamumuo sa Philsaga Mining Corp. (PMC), kumpanyang nagamina og bulawan, sa dugang-suhulan na ₱40 sa ilang pakignegosasyon sa maneydsment. Nag-empleyo ang kumpanya og 2,050 ka regular nga mga mamumuo ug naggahin og gamay kaayong ₱82,000 kada bulan sa dugang suhulan. Sa rekord sa Mines and Geosciences Bureau Region 13 niadtong 2022, adunay gibanabanang 5,040 ka empleyado ang kumpanya ug migasto lamang og ₱692 milyon para sa suhulan, gamay nga kantidad kumpara sa bili sa bulawan (\$137.51 milyon) ug *silver* (\$779,123) nga gieksport niini sa parehong panahon.

Sa mga pabrika ug plantasyon sa kumpanyang Dolefil sa South



Cotabato, kapinkun-kulang 7,000 lamang sa 20,000 ka mamumuo ang regular ug nagadawat og minimum sa Soccsksargen nga ₱341/adlaw. Mas ubos og 8% ang gina-dawat sa mayorya nga ginaempleyo nga mga kontraktwal. Ang Dolefil ang usa sa pinakadakung eksporter sa mga produktong prutas sa tibuok kalibutan ug niadtong 2021 mikita og hangtud \$6.5 bilyon.

Gamayng bahin lamang ang mga plantasyon sa Dolefil sa halos 500,000 ektaryang kayutaan o 12% sa kinatibuk-ang agrikultural nga yuta sa Mindanao nga okupado sa mga kumpanya sa plantasyon.

Gawas niini, adunay dili moubos sa 37 ka *economic zone* sa isla. Anaa sa Davao Region ang 17 niini ug 10 ang makita sa Northern Mindanao. Niini, 12 ang *agro-industrial zone*, 15 ang *information technology park*, ug walo ang *manufacturing zone*. Mas sagad, ang mga mamumuo dinhi nagadawat og mas ubos sa minimum ug nag-atubang sa klase-klaseng atake sa ilang katungod sa pamuo.

Bag-o lang, narekord sa mga rehiyon sa Mindanao ang abereyds nga 7.2% nga Gross Regional Domestic Product (GRDP). Ingonman, wala kini nabati sa katawhan. Sa tulo ka mayor nga isla sa nasud, doble ang tantos sa kalisud sa Mindanao niadtong 2021 nga mikabat og 21.93% kumpara sa Luzon (10.52%).

AB

94th IB sa Negros, berdugong batalyon

Naglunsad og imbestigasyon niadtong Hunyo 24 ang National Solidarity Mission (NSM) nga gilangkuban sa mga representante sa simbahan, mag-uuma, mamumuong panguma, kababayan-an, nasudnong minorya, ug kabatan-onan mahitungod sa pagmasaker sa pamilyang Fausto sa Himamaylan, Negros Occidental.

Sa *press conference* nga gipahigayon niadtong Hunyo 26, gitaho sa NSM ang resulta sa imbestigasyon dili lamang sa kaso sa pagmasaker kundili lakip na ang brutal nga pagpatay kang Crispin Tingal Jr, ug uban pang kaso sa pagpamatay sa isla sa Negros.

Matud sa NSM, dili himulag nga insidente ang nahitabo tungod kay migawas sa imbestigasyon ang bangis ug subli-subli nga paglapas sa tawhanong katungod sa mga sibilyan sa isla. Sa kaso sa pamilyang Fausto ug ni Tingal, silang tanan nakasinati og pagpamig-ot sa militar ayha gipatay.

Usa ka adlaw ayha ang pagtaho, giaresto si Susan Medes, ang lider sa Baclayan, Bito, Cabagal Farmers and Farmworkers Association (BA-BICAF), ang organisasyon nga giapilan usab sa pamilyang Fausto. Kauban si Medes sa 17 pa ka indibidwal nga gipasakahan og gamagamang kasong pagpatay ug pakyas nga pagpatay kalabot sa usa ka ambus nga nahitabo sa Kabankalan City niadtong Mayo 2018.

Kinsa ang 94th IB?

Usa ang 94th IB sa mga batalyon nga gitukod ilalum sa rehimeng Duterte. Gilangkuban kini sa mga sundalo gikan sa 4th ug 6th ID sa Mindanao ug 7th ID sa Luzon. Gibuhian kini sa Negros niadtong 2018 sa tinguhang pulbuson ang rebolusyonaryong pwersa sa isla. Niining tuiga usab gipahamtang ni Duterte ang balaod militar sa isla sa Negros ug mga rehiyon sa Bicol ug Eastern Visayas pinaagi sa Memorandum 32.

Sukad kaniadto, nakahimo ang batalyon og kapin 150 ka kaso sa

paglapas sa tawhanong katungod ug internasyunal nga makitawhanong balaod sa Central Negros. Kapin sa 18,000 ka lumulupyong sa Moises Padilla, Isabela, Binalbagan, Himamaylan City ug Kabankalan City sa Negros Occidental, ug Guihulgan City, Jimalalud, Ayungon ug Manjuyod usab sa Negros Oriental ang apektado sa abusong militar. Kini nga batalyon ang nagpaluyo sa ekstrahudisyal nga pagpamatay sa 34 ka mga indibidwal, lakip ang magtiayong Fausto ug duha nilang anak nga menor-de-edad.

Sugod 2022 hangtud sa kasamtangan, ginapangulohan ni Lt. Col. Van Donald Almonte ang berdugong batalyon. Gikan siya sa 303rd IB nga nakabase sa Negros Occidental. Naila siya sa mga malinglahong iske-ma sama sa pagpadala og mga sulat sa mga lumulupyong sa Barangay Buenavista niadtong milabayng bulan nga nagpakaaron-ingnong makitawhanon ug tigpasiugda sa kalinaw.

Samtang, nagkadaku ang ihap sa kaso sa pagpanghadlok ug intimidasyon sa 94th IBde sa mga sibilyan. Dayag ang militarisasyon, puggos nga pagpasurrender, iligal nga pag-aresto, pagpangguba sa kabtangan, pagdagit, ug pagpakaylap og mga bakak aron hatagag-rason ang paghakop niini sa minilyong badyet gikan sa pondo sa katawhan.



Lain pang tataw nga kaso

Lakip sa mangilngig nga mga krimen sa batalyon ang Oplan Sauron nga gisugdan niadtong Marso 2019 isip ikaduhang serye sa Simultaneous Enhanced Managing of Police Operations (SEMPO) sa Negros niadtong 2019. Katorse ang gipatay ug 12 ang giaresto sa maong "oplan."

Naila usab kini nga nagpaluyo sa pagdagit sa pipila ka bulan pa lang nga bata nga kuno "anak sa NPA" niadtong Nobyembre 2020.

Nag-unang biktima sa batalyon ang mga sibilyang mag-uuma. Sa usa ka insidente niadtong Enero, gipatay niini ang usa ka 49-anyos nga mag-uuma sa Himamaylan City nga si Jose Gonzalez tungod sa pasangil nga myembro siya sa Bagong Hukbong Bayan (BHB).

Naila usab kini sa pagguba ug pagsunog sa mga balay ug katigayunan sa mga pobreng mag-uuma nga giakusahang myembro sa BHB. Sa usa ka insidente niadtong Pebrero 2019, gisunog nila ang balay ni Arlene Pausal, usa ka buwlan human nahitabo ang gilunsad nga taktikal nga opensiba sa BHB sa Barangay Banwage, Guihulgan City.

Walag-too usab ang proyektong imprastraktura nga maghatag kuno og kalsada aron paspas ang pagbyahe sa mga produkto direkta sa mga merkado. Pananglitan ang renobasyon sa kalsada sa lungsod sa Candoni nga adunay gitag-ong 222.8 kilometro ug unum ka metrong gilapdon sa Kabankalan nga mokunekta sa kabukiran sa Ilog ug molapos sa Barangay Tapi ug Magballo. Samtang, walo ka barangay usab sa Isabela, Negros Occidental nga gideklarang "insurgency free" ang pagatukuran sa kaparehong proyekto nga nagkantidad og P160 milyon. Kini kabahin sa pagpangandam sa pagsulod sa mga kumpanya sa mina, enerhiya ug ekoturismo sa interyor nga bahin sa prubinsya. AB



International Labour Organization


₱278,434

KADA BULAN

ang minimum nga **sweldo ni Larry Gadon**, abugadong gibawihan og lisensya sa Korte Suprema tungod sa pagka bastos ug kontra-kababayen-an, isip bag-ong gitudlo nga *presidential adviser* pangkontra-kalisud.

107

representante sa reaksyunaryong estado, 38 gikan sa AFP, PNP ug NTF-Elcac, ang mitambong sa konsultasyon sa International Labor Organization kalabot sa paglapas sa mga katungod sa mga mamumuong Pilipino niadtong Enero.




₱10

kada 100 gramo o mililitro na buhis nga planong ipahamtang sa rehimeng Marcos sa mga **tsitsirya** ug uban pang pagkaon aron magtigum og ₱76 bilyong ipangbayad sa utang.

80%

pag-ubos sa nasikop sa mga mangingisda sa Cavite tungod sa *dredging* sa mga proyektong reklamasyon.




17KA TUIG

na sukad ulahing nakita ang mga biktima sa pugos nga pagdagit nga silang **Sherlyn Cadapan, Karen Empeño, Manuel Meriño, Prudencio Calubid, Celina Palma, Ariel Beloy** ug **Gloria Soco**.

3

anyos na unta niadtong Hulyo 1 si **Baby River**,

anak sa aktibistang si Reina Mae Nacino nga gipriso sa gama-gamang mga kaso. Namatay ang bata human gibulag sa iyang inahan.



1,600

midyang Pilipino ang gipatay

sukad nga gitukod ang upisina sa UN special rapporteur alang sa gawasnong pagpadayag niadtong 1993.

Kampanya aron pabuhian ang tanang bilanggong pulitikal, subling gipakusog

Gilunsad niadtong Hunyo 27 sa Bantayog ng mga Bayani sa Quezon City ang “Breaking chains, Reclaiming freedom from Marcos Sr to Marcos Jr,” usa ka aktibidad aron ipanawagan ang hinanaling pagpalingkawas sa tanang bilanggong pulitikal. Gipasiugdahan kini sa Samahan ng Ex-Detainees Laban sa Detensyon ug Aresto (SELDA) ug gisalmotan sa 13 ka organisasyon ug pipila ka kanhing detenidong pulitikal sa diktaduryang Marcos Sr. Ilalum sa diktadurya, mayor nga kampanya ang panawagan “Buhian ang tanang bilanggong pulitikal!”

Matud sa SELDA, mikabat na sa 49 ang biktima sa arbitraryong pagpangaresto ug detensyon sa unang tuig ni Ferdinand Marcos Jr. Lakip sila sa 778 ka bilanggong pulitikal nga anaa sa rekord sa Karapatan hangtud Hunyo 30.

Lakip sa mga bilango ang kapin 70 ka tigulang, 150 ka babaye ug 90 ka masakiton.

Sa mga rehiyon, Northern Mindanao ang adunay pinakadaghang ihap sa mga giaresto ug gidetine (105), sunod ang National Capital Region (104), Caraga (93), Western Visayas (90) ug Central Visayas (85).

Kadaghanan sa mga bilanggong pulitikal ang napriso tungod sa gama-gamang mga kaso. Giaresto sila nga walay ligal nga basehan ug sa-

gad walay mandamyento de aresto. Gipriso sila tungod sa ilang pangpulikang baruganan ug aktibidad.

“Daw-bao” ang pag-atubang ug pagtaral sa ilang mga kaso. Adunay mga detenidong nakahuman sa maksimum nga sentensya apan wala pa gihapon gibuhian tungod kay wala hustong nasubaybayan ang ilang kaso. Sagad kini sa mga detenidong kabus ug anaa sa layo ang pamilya, ug walay regular nga abugado.

Adunay mga detenidong nahukmang walay sala sa orihinal nga kaso, apan wala gibuhian tungod sa gipasakang “patong-patong nga kaso” sa militar. Aduna usay namatay sa prisohan nga wala man lang naresolba ang ilang mga kaso.

Gidumdum usab sa aktibidad



ang International Day in Support of Victims of Torture. Gawas sa tortyur ug uban pang dili makatawhanong trato, naga-antus ang mga bilanggong pulitikal sa mga seldang piot, kulang nga pagkaon ug dili igo nga serbisyong panglawas.

Tumong sa kampanya nga makakabig og suporta sa sulod ug gawas sa nasud, makatibuok og *network* ug koalision sa lain-laing entidad ug makigdayalogo sa hingtungdnang mga institusyon sama sa United Nations.

Niadtong Hulyo 1, subling gipadangat sa mga tigpanalipud sa tawhanong katungod ang nagkagrabeng paglapas sa tawhanong katungod sa ika-53 nga tigum sa United Nations Human Rights Council sa Switzerland. AB

Dugang-suhulan, pagpanalipud sa katungod ug soberanya, singgit sa LGBT+

Dugang-suhulan, pagpanalipud sa katungod ug kaayuhan sa mga minorityang kasarian, pagdepensa sa nasudhong soberanya ug tawhanong katungod ang pipila ka sa tataw nga panawagan sa gilunsad nga Pride March niadtong Hunyo 24. Nanguna sa aktibidad ang Bahaghari, usa ka nasudhong-demokratikong organisasyon nga nagapanalipud sa mga katungod sa LGBT+ sa nasud.

Gipangunahan sa grupo ang protesta sa Southern Tagalog Pride, Metro Baguio Pride, ug Central Luzon Pride. Nakighiusa usab kini sa martsa sa liboang LGBT+ ug ilang mga alyado sa Makati City ug Quezon City.

Kapin 500 ang misalmot sa martsa sa Metro-Baguio Pride gikan Session Road ngadto sa Igorot Park. Napuno ang protesta sa mabulukong bandera sa balangaw

(*rainbow*), mga plakard nga adunay lain-laing panawagan ug mga pa-sundayag. Naglunsad usab sila og Pride Fair sa Igorot Park gikan Hunyo 21 hangtud Hunyo 23.

Sa Laguna, nagtapok ang gatusan ka delegasyon sa lain-laing sektor gikan sa Southern Tagalog sa kampus sa Unibersidad ng Pilipinas-Los Baños isip selebrasyon sa Pride Month. Aduna usay dakung panagtapok sa Angeles City, Pampanga.

Susamang mga protesta ang gilunsad usab sa lain-laing grupo sa Biñan sa Laguna, ug Cebu City. Aduna usay aktibidad sa Dumaguete City ug Mandaue City niadtong Hunyo 25.

Gidumdum usab sa Bahaghari niining adlaw ang kinaunhang Pride March sa Pilipinas nga gilunsad sa Pro-gay, usa ka nasudnon-demokratikong organisasyon sa mga bayot, niadtong 1994. Kini usab ang pinakaunang martsa sa tibuok Asia.

Gisuportahan usab sa Bahaghari ang SOGIE bill (Sexual Orientation, Gender Identity, and Expression) sa kongreso nga nagaila sa mga katungod sa mga LGBT+. AB

Pagpangatake sa militar sa 5 ka prubinsya

Nagpadayon ang grabeng pagpanglapas sa tawhanong katungod ug internasyunal nga makitawhanong balaod sa milabayng duha ka semana.

Sa Masbate, gipusil patay sa mga sundalo si Randy Dionan Mahinay sa Sityo Abangan, Barangay San Carlos, Milagros niadtong Hunyo 21 samtang nagtrabaho sa konstruksyon sa kalsada sa lugar. Gilambigit siya sa militar sa gilunsad nga ambus sa Bagong Hukbong Bayan (BHB) sa mga aset paniktik ug CAFGU, kung asa usa ang napatay, niadtong Abril 14 sa parehong barangay. Giakusahan siyang mitabang sa mga Pulang manggugubat tungod lang kay nagtrabaho siya sa lugar kung asa nahitabo ang ambus. Aktibo siyang myembro sa kahugpungan sa mga kabus nga mag-uuma nga supak sa planong pagpalapad sa langyawng kumpanyang Filminera-Masbate Gold Project sa lungsod sa Mobo, Uson ug Milagros.

Sulayng pagpatay. Gisulayan pagpatay sa mga sundalo si Rudolfo Ygot sa iyang balay sa Barangay Barag, Mobo, Masbate niadtong Hunyo 18. Ang 41-anyos nga si Ygot usa ka kapitan sa maong barangay

ug lakip sa mga nagababag sa pagpalapad sa Filminera-Masbate Gold Project.

Pag-aresto. Giaresto sa mga pulis ang upat ka tapasero nga myembro sa balangay sa Pagkakaisa ng Manggagawang Bukid sa Tubuhan (PAMATU) sa Barangay Tumulim, Nasugbu sa Batangas niadtong Hulyo 3. Ang upat ka biktima mao silang Felix Cailing Diraya (53), Francis Joshua Diraya (20), Efren Panganiban (51), ug Lanie Villa Diraya (48). Giaresto sila human gipanalipdan ang ilang katungod sa pamuo ug pagpanimuyo.

Sa Negros Occidental, giaresto ang lider-mag-uuma nga si Susan Medes. (*Tan-awa ang kalambigit nga artikulo sa panid 7.*)

Pagpamig-ot. Sa Negros Occidental, giinteroga sa mga sundalo ang mag-uumang si Benjie Teruel sa detatsment sa CAFGU sa Barangay Hilamonan, Kabankalan City niadtong Hunyo 19. Si Teruel, adunay kabilinggan, pugos nga ginapaang-

kon nga lambigit siya sa pag-atake sa hukbong bayan sa maong detatsment niadtong Hunyo 13. Gihulga ang iyang kinabuhi ug seguridad sa iyang pamilya.

Pagpamusil. Nagbunga og grabeng kahadlok sa mga residente sa Sityo Cansampo, Barangay Bagtik, La Libertad, Negros Oriental ang pagpaulan og bala sa 62nd IB sa lugar niadtong Hunyo 23 sa hapon. Nataho usab sa barangay ang pugos nga pagsulod ug pagransak sa mga balay sa residente.

Sa tungatunga sa Hunyo 23 ug Hunyo 30, gigukod ug gipabuthan sa mga sundalo ang may kabilinggan sa hunahuna nga si Junior de los Trico sa parehong lugar.

Pagpamomba. Naghulog og 14 ka bomba ug makapila ka beses nga nang-istraping ang mga sundalo sa mga umahan sa mga barangay sa Bazar, Naguilian, Sacaang ug Bilabila sa lungsod sa Sallapadan, Abra sa tungatunga sa Hunyo 26 ug Hunyo 28. Balos kini sa mga sundalo human ang duha ka magkasunod nga armadong aksyon sa BHB batok sa ilang mga tropa. AB

Gिकासuhan og “terorismo,” midaghan

SA IKATULONG TUIG sa Anti-Terrorism Law (ATL), nagprotesta ang lainlaing progresibong grupo atubangan sa opisina sa National Security Council sa Quezon City niadtong Hulyo 3. Gibatukan nila ang padayon nga paggamit sa estado sa balaod para dayag nga sumpuon ug pahilumon ang mga kritiko sa rehimen ug mga progresibong organisasyon.

Sa Southern Tagalog pa lang, 15 ka indibidwal na ang gिकासuhan sa paglapas sa ATL. Pinakabag-o dinhi ang duha ka tigpanalipud sa tawhanong katungod nga gिकासuhan niadtong Hunyo 26 sa 59th IB sa “paghatag og materyal nga suportang” sa mga “teroristang organisasyon.” Ginapagawas nga milapas sa Section 12 sa maong balaod silang Ken Rementilla ug Jasmin Rubia. Ang pagkaso sa “pagtabang sa terorismo” tungod sa gihimong *fact-*

finding mission (FFM) niadtong Hulyo 2022 aron imbestigahan ang pagpatay sa AFP sa batang si Kylene Casao sa Taysan, Batangas.

Gilambigit usab sa kaso ang pangalan ni Hailey Pecayo, tigpamaba sa grupong Tanggol Batangan, kung asa ginapagawas nga usa siya sa naka-engkwentrong Pulang manggugubat sa mga sundalo niadtong Hulyo 18, 2022.

Samtang niadtong Hunyo 29, nadawatan usab ni Rev. Edwin Egar,

Interim Officer sa Karapatan-Southern Tagalog, ang usab ka *subpoena* sa paglapas kuno sa pari sa maong balaod.

Nataho usab sa Central Luzon, Bicol ug mga rehiyon sa Mindanao ang paggamit sa ATL aron sumpuon ug prisohon ang mga aktibista ug progresibong personahe. Ang ATL usab ang nag-unang suspek sa nagapadayong pagsensor sa 27 ka *website* sa mga progresibong organisasyon sa internet. Arbitraryo usab nga gitudlo sa Anti-Terrorism Council, nga gitukod sa ATL, ang mga konsultant sa National Democratic Front of the Philippines ug pipila ka mga personahe sama ni Dr. Natividad Castro isip mga “terorista.” AB